

湖
海
文
傳

湖海文傳卷四十二

青浦王昶德甫輯

書

與賈雲臣論史記書

朱筠

雲臣足下比日不見爲念前夕足下與鑒成相過辨史記之名自遷始前古無之且以周本紀伯陽讀史記爲遷所妄加者雖一時之論筠頗不以爲然然足下方持論甚堅且力筠時亦未有實據以對恐不足以折足下之口而服其心故辭云徐考之及退而考之果非也古之王者必有史官其所書爲史記尙矣記曰勛則左史書之言則右史書之藝文志曰左史記言右史記事事爲春秋言爲尙書史記之名不始于遷猶春秋不始于孔子也杜預云春秋者魯史記之名楚謂

之禱杙晉謂之乘而魯謂之春秋其實一也孔穎達云據周
世法則國有史記當同名春秋獨言魯史記者仲尼修魯史
所記以爲春秋也賈逵云周禮盡在魯矣史法最備故史記
與周禮同名如三說者信可謂史記始于遷乎然足下必謂
三子皆後于遷承遷說也孔安國尙書序云先君孔子約史
記而修春秋班固贊遷傳亦云孔子因魯史記而作春秋然
則春秋之先有史記可謂自遷始乎足下又必強調安國與
遷同時或附會遷說而爲之且如是是亦未得史記之書之
可見而徵者汲冢周書史記詳穆王命左史戎夫取古之亡
國華氏以下二十八君以爲戒俾戎夫朔望以聞其序曰穆
王思保位惟艱恐貽世羞欲自警悟作史記汲冢書雖後出
晉太康中然劉向所錄及班固志並著周書七十一篇謂孔

子所論百篇之餘而司馬遷周本紀述武王克殷事正與之合其可以得史記之名所自出矣然筠又有所考者不獨史記之名不自遷始而遷書之名史記或反出於後世遷之自序其父談之言曰自獲麟以來四百餘歲諸侯相兼史記放絕又曰遷爲太史令紬史記石室金匱之書李奇注亦云遷爲太史令後五年適當武帝太初元年此時述史記曰放絕曰紬曰述則知當時實有其書而非遷始作之明甚至其厯舉所著本紀表書世家列傳之名旣皆列于篇而又曰凡百三十篇五十二萬六千五百字爲太史公書序略以拾遺補藝成一家之言未嘗自列之爲史記也班固作傳亦仍之云遷死後其書稍出宣帝時遷外孫平通侯楊惲祖述其書遂宣布焉贊稱遷有良史之材其善序事理謂之實錄而藝文

志春秋家有太史公百三十篇十篇有錄無書未嘗云史記百三十篇也至隋經籍志云史記漢書師法相傳並有解釋於是並列裴駙徐野氏鄒誕生三家所注撰始以遷書謂之史記然遷書自名太史書不名史記而後人特重其書以爲自黃帝以來訖於楚漢古史記之書皆賴是以存遂以史記之名當之相傳於世其後韓退之柳子厚出倡爲立言明道之文獨仍其書爲太史而不改故其言曰下逮莊騷太史所錄曰叅之太史以著其潔尤其足以爲據而無疑者夫古者曰書曰春秋曰史記曰語曰志曰意曰紀不同大抵史家者流要皆各有承述指義隨所得以名其書非如後人輒喜新異更自標置曰吾著某書某名不惟其實而名之求比考其名以求其書之所言或實不足以稱之古人不若是也足下

當思吾輩讀書平心博覽以求古人之用意猶懼不得一時放然喜議論往往是非顛倒失實不足據或又從而執之此大不可斯辨所爭甚小然名實之際好古者所講求而竊竊大懼足下不學之患將中於是所當與足下以爲切戒竊非好辨實退而反復考之知其如是故以聞幸財擇之弁乞示鑒成

與梁耀北論史記書

錢大昕

足下謂秦楚之際月表當稱秦漢不當以楚踞漢先儼然承周秦之統其意誠善然蒙未敢以爲然也史公著書上繼春秋予奪稱謂之間具有深意讀者可於言外得之卽舉月表一篇尋其微旨厥有三端一曰抑秦二曰尊漢三曰紀實何謂抑秦秦之無道史公所深惡也秦雖并天下附書於六國

表之後不以秦承周也及陳涉起事秦猶未亡也而卽齊諸
楚齊燕趙之列則猶六國視之也雖稱皇帝者再世與楚之
稱霸王等耳表曰秦楚言秦之與楚匹也何謂尊漢史公以
漢繼三代不以漢繼秦若繫漢於秦之下是尊秦而貶漢也
十二諸侯年表不題周而周尊秦楚之際月表不題漢而漢
尊秦楚皆亡國之餘以漢承之失立言之體矣陸賈楚漢春
秋其命名不如史表之正也何謂紀實楚雖先亡覆秦之社
稷者楚也漢高祖興親北面義帝漢王之國又項羽封之秦
亡之後主天下命者非楚而何本紀旣述其事而表又以秦
楚之際目之言天下之大權在楚也此亦實之不可沒者也
自王子師詆子長爲謗史宋元明儒者訾議尤多僕從未敢
隨聲附和蓋讀古人書誠愛古人而欲尋其用意之所在不

當執單詞以周內文致也

與梁耀北論史記書

錢大昕

來教駁僕所論武安侯奉邑食酈一條謂欒布所封俞乃別一地非清河之酈且言縣侯必盡食一縣反覆援引可謂博學而明辨矣然愚意猶有未釋然者攷呂后封俞侯呂它景帝封俞侯欒布班表皆不言封國所在至蘇林酈道元司馬貞輩始以清河之酈當之足下疑其別有一俞地固無不可至謂封國必盡食一縣不獨陳平一人則愚請以史漢正文證之樊噲初封舞陽侯其侯益食邑者再後乃定食舞陽五千四百戶則樊噲初封未能盡食舞陽一縣也夏侯嬰初封汝陰侯其後益食邑者三乃定食汝陰六千九百戶則滕公初封未能盡食汝陰一縣也灌嬰初食潁陰二千五百戶已

號潁陰侯其後乃定食潁陰五千戶則灌陰初封未能盡食潁陰一縣也蕭何封鄼本八千戶後又益二千戶及其後裔紹封戶或二千四百或止二千或并不及二千而鄼侯之名不改曹參封平陽本萬六百餘戶及其後裔紹封僅二千戶亦號平陽侯然則列侯但以封戶定其疆界而食之此外尙有餘地仍屬有司理可信矣更以後漢書證之伏湛封不其侯傳國至建安中始絕而靈帝時已封朱鄴爲不其鄉侯則不其一縣除伏侯食邑外尙有它鄉也以是推之欒布食邑僅千八百戶鄒縣戶口必不止此數其爲武安食邑亦無足異矣漢縣本有大小之分其大小以戶口而定所謂萬戶以上爲令減萬戶爲長也陳平封五千戶與曲逆見戶數適相等故得盡食其縣其餘諸公封戶雖多而其縣見戶或浮於

封戶之數則不能盡食矣非平之食封勝於蕭曹也足下又謂陳平盡食曲逆乃兼指亡匿戶口言之亦恐未然夫漢之封國雖計戶口仍以疆域爲斷史公言漢初大侯不過萬家小者不過五六百戶後數世民咸歸鄉里戶益息蕭曹絳灌之屬或至四萬小侯自倍是則復業戶口在列侯封內者例得兼食之不獨曲逆爲然史何必特書於本傳耶若陸賈之說陳平云足下食三萬戶侯乃據秦時版籍言之平旣全食此縣故舉全盛之數以誇其富耳若云當時復業真有此數則十數年之間斷不能頓增五倍而休養百餘載至元光之世乃轉耗其半尤無此理矣僕於讀史擇善而從非敢固執已見但以史漢參攷封君之盡食一縣者自曲逆而外旣不多見而樂布之封卽其說始於蘇林林去漢不遠或有所據

故復申具其義唯足下幸教之

與朱震江書

王元啟

昨得手示述史記世系圖所載云云知足下尙有未允於僕之所論者非足下之不察由僕所見之不廣所論之太略故也輒敢復獻其愚唯高明裁擇焉史記一書成於馬遷之手其他爲後人所續附者須一一辨其由來縱有瑕瑜各無相揜如天漢以後事蹟褚少孫續錄者別之爲褚少孫三皇本紀司馬貞補撰者別之爲司馬貞諡法解張守節增入者別之爲張守節他若晉宋以來徐廣裴駙諸家訓解各有主名豈得槩目爲史記一語不讐卽以疏略牴牾爲馬遷咎乎夫自少孫以下諸家皆自漢迄唐世所稱名人魁士其所著書皆卓然自立足與史記並垂不朽者然猶不容相假如此今

世俗所傳譜系諸圖足下知其爲何代之書抑出何人手筆而槩目爲史記乎三代世表史記第十三卷之文也以帝王世爲經其屬爲緯桓譚所謂旁行斜上並效周譜此太史公親筆也顧謂觀乎此而知五帝三王同出於黃帝則可矣謂史記曾有是語則罔矣世表之例承統續緒爲君者母論或繼或及總謂之一世以殷代論之從湯至紂二十九世此太史公筆也孰爲子孰爲弟則附書於世系之下使讀者得因是以攷其服屬之遷近亦史公筆也故以父子相承之次言之謂從湯至紂爲十七世亦可也今不言二十九亦不言十七直云十八世則是無稽之臆說矣大抵近人讀書專事鹵莽如四子五經未嘗精求其本義輒復妄自立說後生輩樂其便已但知有諸家講說益不復知有經義矣自盤之鐘自

燭之籥擿埴索塗誠可憫也足下慨然奮筆思欲悉正其誤而示之以精心研究之方顧已亦未免自蹈於誤此鄙人所爲願効攻錯之勞也卽以四子書例之鄉黨一篇時解有擯介棖闌諸圖孟子許行章亦有九河淮漢諸圖遂以爲孔門弟子及子輿氏所著之書可乎况陽甲爲祖丁子而與南庚並列盤庚小辛小乙並陽甲之弟而與陽甲分爲四代武丁爲小乙之子武乙之曾祖也而以武乙爲祖庚祖甲之父又以武丁爲武乙之孫而與庚丁並列舛謬如此稍知讀史者皆能笑之似未足據以爲信也要之遷始以漢人紀漢事已不知高帝世系元儒金仁山謂其父太公而亡其名母劉姬而亡其姓況二千年前得於所傳聞者胡可盡信顧不盡見其書究觀其義而遽欲折其是非則又歐陽子所云不盡人

之辭而欲斷其獄之曲直也其能使之必服乎僕之云云非
敢爲遷史護短蓋欲爲大集磨玷耳他若以周公爲太姒第
六子乃因史公自序有太任十子之語索隱所註云爾其實
是太姒第四子見於管蔡世家一篇首尾序次甚明周公係
管叔之弟蔡叔之兄索隱因管蔡霍三人同惡而類序於前
故反屈周公於第六也前所示上公當服冕旒一紙後二條
極有關係偶爾遺失便中更乞示知

與錢辛楣論熊方後漢書年表書

盧文弨

讀大作熊方後漢書年表序校正精核指摘彌復切當源流
異同之故數言瞭然於後復丁寧於元文之未可輕改此不
欲沒著書者輯綜之勞而并慮後人紛更之失致掄其前美
誠凡傳述舊人文字者皆當若是文弨向來持論亦然然於

此書反覆披對瑕釁甚多若遽流傳深恐疑誤學人有不得
不與閣下商之者如前表於侯封之下間係以所在郡邑之
名此自是當時文簿可徵確乎不謬今若欲仿斯例自當求
之本傳如濟北惠王壽傳云分太山郡爲國則當係以太山
而熊氏則署云兗州又河間孝王開傳分樂成勃海涿郡爲
國則當並係三郡之名而熊氏則署云冀州夫州之爲境也
遼矣今不切指其所封之地而舉一州以相函蓋何所當乎
且攷章懷注中引據舊書亦自有明係所屬者如武邑侯耿
植注云屬信都而熊氏署云安平不其侯伏湛注云屬琅邪
而熊氏署云東萊蓋熊氏但知以續漢書郡國志爲据而不
知事實之有不符也其最不可通者如淮陽王名之下署云
陳州卽郡國志並無此州名閣下知其誤而省去州字若以

愚見揆之陳字亦不可留蓋淮陽之在前漢本爲國後漢章
帝章和二年始改爲陳國今予之封在光武時以斯知其不
可留也至於鄉亭之侯但當係其本縣其鄉亭之名固有與
縣名同者不可混也范書中有明著其爲某縣之鄉侯者如
抗徐之爲烏程東鄉侯楊茂之爲烏傷新陽鄉侯烏程烏傷
皆會稽屬也二人所封皆其縣之鄉也今熊氏於異姓諸侯
表一則但書東鄉侯抗徐不係以烏程而係以南陽蓋誤以
爲南陽之東鄉縣也一則兼書烏傷新陽鄉侯楊茂下係以
會稽又係以汝南是又誤以茂曾爲兩縣之侯也夫旣明曰
鄉侯而可曰縣侯乎卽二人之體例亦自不畫一愚以爲不
若并州郡而盡去之亦未見其必不可已也蓋吾侯翼一段
閣下校勘極細足以正熊氏之謬然猶以爲當仍其舊愚意

頗似有所未安蓋翼爲河間孝王開之子出後平原懷王勝建光元年貶爲都鄉侯遣還河間則此以後事仍當以翼係於河間之下本末方得具明所受蠡吾之封則父開請分國以與之者也於後其子爲桓帝追尊翼與開而不及勝以非所承也卽後桓帝封兄顧爲平原王但云奉翼後不云紹封熊氏之云紹封者妄也使桓帝以其父終爲勝後而以其兄紹封則桓帝獨非勝之孫乎而追尊顧何以不在此而在彼也夫倫類典禮所關匪細後人將于此置喙焉而可輕徇乎至若始封之君當列於首其追尊者止當於注中附見不得以冠始封之上乃齊武王縯魯哀王仲皆非始封也建武二年封縯子章爲太原王興爲魯王以興嗣仲二王乃始封也熊氏一則書太原哀王章嗣夫嗣王者嗣王也史不載先封縯

爲太原王何嗣之有於興則書曰紹封攷建武十五年方追
諡續爲齊武王仲爲魯哀王皆依其子之封也而熊氏之所
謂嗣與紹者非其率意妄造者乎又魯王興後徙封北海子
孫迄於漢末不改若依前書之例雖有始封而以後之定名
爲準則此當大書北海靖王興冠首席乎得之異姓如壽張
敬侯樊重非始封亦不當冠首以於實事不合故也更甚有
謬者異姓諸侯表中有桃鄉侯福當塗鄉侯亢熊氏旣皆明
注云以任城王安母弟封而又係其下云姓闕文夫任城王
安者東平憲王蒼之孫也福與亢亦憲王孫行也而乃不知
其姓置之於異姓表中使後人舉而正之則吾輩亦當與熊
氏分過矣又有安衆侯劉宣卽安衆侯劉崇之從弟襲封爲
侯者又慎靖侯劉隆本傳明云南陽宗室而熊氏並置之異

姓其用意不可曉也盧芳於建武十六年封代王以其稱武帝曾孫則不能不載之於同姓但於注中明著其詐亦自不沒其實不宜徑削之也他如漢澤侯鄧鯉曲成侯劉建皆光武時封見寒朗傳而熊氏並遺之若按章懷注所引及水經注唐宰相世系表亦尚有可補者至其世系相承位置殊舛如魯哀王之曾孫一行凡敬王睦之子如威如毅皆綴於其叔父之下此類更不可枚舉若一切因循不但爲無用之書反慮其足以惑亂視聽質之鮑君其意亦欲仍舊而附駁正於其左如集解索隱注史記之例旣完然爲熊氏之書而又以其誤誤後人洵兩得也但如同姓入異姓之類不識可改歸否閣下尙有以明教之

與鮑以文書

盧文弨

熊氏後漢書年表今已錄出清本可以授梓人矣所以遲至
今日者實以此書紕繆極多若徒校訂一二傳寫之譌未便
卽稱善本仍然留後人指摘何益前與錢宮詹書中已略道
一二今書中凡改正增刪之處俱有校語繫於其下可無庸
委悉俱述姑撮其大段言之侯表中功狀不明紀事失實或
以更始時事入之建武或以主將之官加之偏裨置臨邑侯
復於王威之上而其子駒駘之嗣侯反遺之本傳並不言國除故文獻通考
駘駒錫光封鹽水侯而但稱列侯又沒其不從王莽之大節
而泛稱曰降征羌侯來歙爲光武祖姑之子而以爲甥宣城
侯孫美襲其兄之封而以爲隨父鄧騭諸弟並未受封而書
其子皆曰嗣袁逢嗣侯其諡曰宣文而誤以爲宣父與鄉亭
名一例宣城漢壽皆書叛曹操所殺亦云誅百官表中何苗

本不與何進同意而乃以謀誅張讓并歸之虞詡代陳禪爲
司隸校尉而反謂禪實代詡袁敝代劉愷爲司空而敝之拜
反在愷未遷官之前又遺漏甚多今於正史所見年代可考
者補之其年代疑似與見於劉昭章懷注中者亦於校語內
附著之視元本爲少詳贍矣范史紀傳互有參差所當擇而
從之至如北海哀王基濟南孝王香東平懷王忠諸人之年
熊氏實沿本傳之誤今俱加以訂正然而猶有不能盡易者
焉如宮詹之所規者但仍之而著其誤則以此固熊氏之書
也如欲別加撰造又似不必故未免依違於其間而前後致
有未盡盡一之處然猶愈於襲訛沿謬云爾足下其覆審之

答明史館某論史事書

江由敦

兩辱手翰如接面談發到書俱已領悉當轉送兩總裁覆閱

王本列傳聚數十輩之精華費數十年之心力後來何能追
躋萬一若存輕詆之見非愚則妄但就其中如韓林兒四人
爲一傳張士誠四人爲一傳似當以卷帙多寡而分非別有
義例也去冬高安先生謂韓郭不應同傳退而思之太祖實
曾用龍鳳年號似不必爲諱且用龍鳳年號稱宋後亦何損
於太祖得天下之正今議其不當用可也以爲不足存而刪
之則事之非義者當概刪耶似非所以傳信也昨因重費商
量謬擬羣雄混合之說亦因王本韓郭與徐陳同傳亦無不
可與張方諸人同傳雖曰調停實仍舊貫今若以韓林兒與
羣雄同列而子興獨爲一傳或與高安意允協蓋滁陽封王
立廟原與林兒不同亦有義例非敢模稜也統惟裁定當初
開館時某不揣愚陋私有蠡說數條中謂明代文苑人物燕

雜不倫潛溪一代宗工當爲弁冕而遵巖震川三數公附其
後斯足增重藝林旣知所見之隘遂棄去不敢質諸宗匠及
昨修傳時謬議文臣佐命李劉並列遂析四先生一傳復用
舊說實自愚發之不敢諉過他人但愚意借以推崇文學而
同事者因而薄視潛溪則迹同而意乃相悖矣楊憲奸險小
人王本以官爵列李善長傳後然人實不倫應否別附均候
裁定劉宋傳當卽擬贊稿呈削或俟閱章葉兩傳後再酌合
衆偏以成一是恃鴻鈞陶冶耳王稿視名山藏明書諸本不
啻遠勝今若無所據依信筆增損則其行文疵謬頗少讀至
終篇一無可議然但略改文法益足形其淺陋惟有考證事
實或有脫漏互異及前後例亂之處補其不逮庶爲王氏功
臣非獨以依樣葫蘆不足仰塞 詔旨而苟爲立異也但裨

官野史雖說叢談無足徵信而實錄編年繫日事蹟釐然雖
是非褒貶不足爲憑而一人之出處及所建之言所任之事
首尾具在明白無疑故查實錄以改原文視臆斷較有把握
亦非不知叩頭乞哀實錄原有山筆而一一墨守瞽趨也外
間推崇王本太過遂謂不可增損今卽以行文而論江陵傳
自是神宗朝第一大傳而王稿竟就史料首輔傳刪節成文
其中描寫熱鬧處皆弇州筆弇州逞才使氣抑揚軒輊之間
往往過情平心觀之自見且私書不妨裝點而乃據爲信史
卽令弇州知之恐亦未免失笑神光以後此類甚多非敢攻
擊前輩因羣推王本耳食者多冀閣下主持斯可耳承手論
之殷率爾冗布統惟鑒察

與邵二雲前輩書

法式善

尊齋飫聆教言承示一切比在館中勘校諸功臣傳稿併付
到諸冊籍其中訛舛闕遺無所不有良由外省之陸續咨報
到非其時中秘之前後纂修人非一手加以歲月之久疑誤
相仍莫能指正伏惟閣下以網羅一代之才騰躍百家之筆
職掌所存自宜及時釐定以爲傳史謹就管窺所及條列其
事願先生亮察而審正之幸甚

一功臣傳有從逆之臣誤行載入者如貴州巡撫曹申吉叛
降吳三桂詳見實錄及平定三藩方略今功臣傳有曹申
吉傳言其殉難而甘文焜傳仍言申吉從逆兩傳自相牴牾
應改正

一功臣傳有殉難大員未經載入者如辰常道劉昇祚辰州
知府王任杞左江道周永緒平樂知府尹明廷殉難年月及

贈官祭葬俱詳載 實錄紅本及一統志而功臣傳未載其餘殉難之文武員弁見 實錄紅本而不立傳者甚多俱應查增

一功臣傳有殉節於前明而誤入 國朝忠臣者如雲南殉難之楊憲張景仲等俱死於土司沙定洲之難其時明唐王桂王相繼稱號雲南未入版圖楊憲等爲明殉節而功臣傳誤以爲順治二年三年事應一體刪去歸入勝朝殉節諸臣錄

一功臣傳有年月舛誤者如廣西巡按御史王荃可殉節在順治九年詳載 實錄及一統志而功臣傳誤作康熙間殉難似此者甚多俱應改正

一功臣傳有姓名舛誤如江南撫標遊擊成國挺詳見

實錄紅本而功臣傳誤作廷挺其餘官爵贈廕舛誤遺漏者不可勝指俱應改正以上各條一時拉襍書之再有所得卽錄呈採擇餘不宣

復王舍人書

楊述曾

頃接來書傳總裁所諭分注紀年欲改綱目舊文稍變其例總裁統領史局意所欲改纂修敢不恪遵而來札又云一字去留事關千古史筆難誣倘實有不可更定之處亦不必強爲從事具見執事虛衷商榷之盛心敢不再爲詳陳以俟裁奪考分注紀年雖於義例無關而全書體製前後不可不一今欲削去五季帝號廟謚其例當斷自周亡後之七國起蓋七國之稱王猶五季之稱帝五季旣削則秦不得稱莊襄王當書秦君某楚不得稱考烈王當書楚君某他國皆然并於

凡例標明下書曰後南北朝五季倣此前後體例方爲畫一
此一也唐漢短祚閩蜀偏隅誠無可紀但史例建號不論短
長列國無分大小審如所云則項羽之亡也忽焉將不得稱
之爲霸王春秋之滕薛小國可不稱之以侯伯歟此又一也
南北朝之於五季政猶魯衛然以五季例南朝及北朝之齊
周則可若以例魏則恐未安魏起代北遂有中原非同篡奪
且孝文令主聲名文物後世所稱分注將不帝而謚之乎將
來奏上或蒙詢問對答殊費周章是宜預爲籌畫此又一也
宋太祖開基誼辟書法自當上媿唐高不得與五季並論但
晉武脩文亦嘗一統或一傳而亂或再世而亡其禪代之初
將稱帝乎抑或否乎此自當與唐宋同例其又何以服予桓
黑獺後世若有胡致堂諸公必起而肆其訾議矣此又一也

再者修輯官書日月既有定期謄繕未宜數易今陳設本已進至二十卷翰林謄寫本已至四十卷若但改五季而於七國三國十六國南北朝仍然依舊則不成體例若因變例而奏聞將陳設本及已謄正本俱發下逐卷挖行補字恐於事勢亦多未便且或蒙

聖明詰問何不預先裁定而直至此時奏請或總裁引咎或纂修待罪亦不可不先爲之地此又一也要之輯覽一書非他書可比既奉

硃批又將頒發士大夫必家置一編藝文志必錄於書目名歸總裁纂修無與所以自始迄終周詳規畫者正期無負總裁非敢固執已見曉曉不已也敢祈執事轉覆總裁具述副意變例不如仍舊自朱子書出至今已六百餘年未有議及

分注紀年者又何必一朝改易徒致紛紜區區之忱不敢不
白如總裁必欲改換書已入寄行在可卽挖行補字依奉
更定不必再爲寄館徒費往還但期於報中寄知以便下卷
遵照辦理至章奏仍依原文及書俎例已具悉不更贅傳國
寶一事現煩趙君赴閣恭閱下報寄覆矣

答談階平書

錢大昕

得足下書道及姚禮部駁僕漢書攷異中說秦三十六郡一
條僕所據者班孟堅志本文以志解志非敢臆造禮部執史
記分郡在始皇二十六年而略取南海諸郡乃在三十二年
不當列於三十六郡之數似矣僕試卽以史記質之則三十
六郡之分本非一年中事如東郡則始皇五年置矣潁川則
十七年置矣會稽則二十五年置矣豈皆在二十六年乎不

特此也巴蜀置於惠文南郡南陽隴西北地置於昭襄三川
太原置於莊襄則并非始皇時矣上郡魏所置雲中鴈門代
郡趙所置上谷漁陽右北平遼東遼西燕所置漢中楚所置
則并非秦置矣而史皆繫之二十六年者以是歲爲兼并天
下之始封建變爲郡縣至是遂一成而不可易故特記之前
所置之二十餘郡與後所增之三郡總以三十六該之而前
後復隨文別見古人敘事參差不若後人之泥也且南海三
郡不必定在三十二年攷南越尉佗列傳秦已并天下略定
揚越置桂林南海象郡以謫徙民與越雜處十三歲其云十
三歲者據秦并天下至二世元年數之也王翦傳亦先言平
荆地爲郡縣因南征北越之君而後言二十六年盡平天下
依此二文則二十六年分三十六郡正當有南海三郡矣均

是史公之書禮部援本紀以證其說僕卽可援二傳以伸僕之說矣史公但云分三十六郡初未嘗實指某某郡班志則明言之矣其敘漢郡國以秦三十六郡并高文景武昭所增正合百有三之數非猶有未備也司馬彪志郡國亦云漢承秦三十六郡皇甫謐帝王世紀云秦兼諸侯置三十六郡蓋漢魏以前未有別南海諸郡於三十六之外者別之自裴駮始唐人修晉書祖述裴說因有四十郡之目相沿到今僕謂不如班史之可信也馬班二史述漢初事郡名固有出於三十六郡之外者此則諸侯私置或二世增設要非始皇三十六郡之舊且亦隨置隨廢故班志略而不言以其不足言也非有所缺漏也裴駮之說不知所本恐是誤會始皇本紀之文若以前後文互證則是年實止置齊琅邪兩郡耳并前後

通計之班志豈真與太史公相矛盾哉僕非護前而憚改顧史漢正文具在難以裴氏單詞遽詆班志爲未備故稍申愚管以備折衷足下試復於禮部不識更有以啟僕之惑否

再與談階平書

錢大昕

僕前札中言及秦三十六郡鄙意但謂史公於始皇二十六年書分天下爲三十六郡兼南海三郡在內合前後所置言之班志所云與史公本非牴牾耳又引王翦南越兩傳以證略定揚越時已置此三郡弟爲存疑之詞初非因此并疑三十三年不當有略取陸梁地之事也足下謂王翦南征百越之君卽指會稽一郡然賈生過秦云南取百越之地以爲桂林象郡則百越與會稽究非一地王翦傳先言竟平荆地爲郡縣而後言南征百越之君可驗百越在會稽郡之外矣而

南越傳實有與越雜處十三歲之語足下雖善辨但以本不可曉置之愚謂此語非甚難曉也當秦初并天下時王翦南征百越已有三郡之名但因其君長仰自治之如後世羈縻之州其後使尉屠睢略取其地黜其君長置官吏如內郡則在三十三年故本紀特書之傳與紀互見而兩不相妨徐野民未悟及此是以存疑到今僕又讀東越列傳云秦已并天下皆廢爲君長以其地爲閩中郡與南越傳文略同而本紀不載置閩中郡其所以有載有不載者閩中雖有郡名仍以其君長治之秦未嘗別置守尉也南海三郡其初置蓋與閩中同厥後乃有任囂趙佗輩則等於內地郡縣矣此所以不書於二十六年以前而特書於三十三年也足下以爲然乎否乎卽使僕所引南越王翦兩傳果如足下說而秦之但有

三十六郡別無四十郡則兩漢書有明文不可據裴駙說以
汨之更不必因裴說之未的而別求他郡以實之此僕之本
意也惟足下詳察

復談孝廉書

姚鼐

某頓首星符先生足下前辱以辛楣先生說秦三十六郡事
與僕二郡說異示以相較甚善比未及詳答今更攷尋知少
詹亦未審也按秦始皇紀分天下爲三十六郡在其二十六
年迄三十三年略取陸梁地爲桂林象郡南海是已爲三十
九郡至秦亡時或更有分合不知凡若干郡也子駿孟堅蓋
已不能詳知姑舉其初曰本秦京師爲內史分天下作三十
六郡下遂及漢興云云其說實有未備不可拘守也僕攷秦
楚間郡名得四十餘漢地志郡國其有注云秦置者凡三十

六少詹所舉謂始皇所分三十六郡卽是也而桂林三郡在其中其外史記紀秦昭襄王置黔中郡矣陳涉世家云比至陳陳守令皆不在則知有陳郡矣丁疾等圍東海守慶於剡則知有東海郡矣項羽紀趙將司馬卬定河內故立爲殷王王河內蓋秦有河內郡也田安下濟北數城留侯世家孺子見我濟北亦秦郡故曹參定濟北郡也至於鄆東陽膠東膠西博陽城陽衡山諸郡皆名見楚漢之交者此或秦置耶或楚漢置耶舉未可知將以推始皇二十六年分三十六郡之數惟南海桂林象郡必不當數之少詹誤耳其餘四十餘郡不能定其決爲後置者何郡也裴駙所舉三十六郡與少詹互有短長僕作二郡沿革攷時姑因六朝人說以鄆爲秦郡究之秦初郡必不可指數謂有鄆者未必非亦未必是也多

聞闕疑庶得之耳尊著斗建考甚精當然猶覺文太繁減其大半乃善餘當相見論之不具

與姚姬傳書

錢大昕

昨於新城陳公子碩士所讀大著廬江九江二郡沿革攷以今縣推見漢置域所謂君子之言信而有徵者矣惟以廬江爲衡山故名則猶有未慊於心者夫淮南之分爲三在文帝十有六年曰淮南曰廬江曰衡山皆秦九江郡地在戰國則皆楚地也秦之九江郡跨江南北楚漢之際以江南地析置豫章郡而黥布封淮南兼得之淮南厲王因布故封文帝封厲王諸子盡以故地還之故廬江國兼有豫章郡得與楚交通也景帝平吳楚徙廬江王賜於衡山而廬江豫章俱爲漢郡其衡山之爲王國如故也武帝元狩元年王賜以謀反誅

而國除爲衡山郡其三年以衡山地置六安國自後遂無衡

山之名

景十三王傳封膠東王寄少子慶爲六安王王故衡山地

漢志叙衡山沿革於六

安下不系於廬江下明乎衡山之與廬江無涉也廬江之爲

郡在孝景初自後別無廢省之人伍被說淮南王安云南收

衡山以擊廬江是衡山與廬江絕非一地今欲并而合之難

矣黥布初封史稱九江廬江衡山豫章郡皆屬焉攷其時吳

芮徙封長沙以其地益布而芮故都邾則當兼得江夏地屬

王子勃封衡山亦當兼有邾軼蕲春諸縣至武帝建六安國

分土始狹非復衡山之舊光武初因省六安入廬江若西京

則衡山自衡山廬江自廬江未嘗合而爲一也讀史之病在

乎不信正史而求之過深測之太密班孟堅志郡國沿革精

矣間有未備以紀傳攷之無不合也孟堅所不能言後儒闕

其疑可矣謂漢初之廬江在江南武帝時已罷昭宣之間改衡山爲廬江皆孟堅所未嘗言所據者僅廬江出陵陽一語然陵陽乃鄣郡之屬縣非淮南故地恐難執彼單辭以爲定案也先生當代宗師一言之出當爲後世徵信敢獻所疑幸明以示我

上王述菴先生書

錢 坫

坫謹白漢陰一缺處深山之中又乏明師益友執經問業之處鎮日寂坐篋中惟有漢書一本亦別無他書互斟酌自去夏至今惟專注十表業已寫定成冊尙俟進謁時附呈鈞定於向日之疑參訂間有一得如左馮翊陽陵縣爲孝景所立而高帝功臣表有陽陵侯傅寬司馬貞則云楚漢春秋作陰陵然後知爲九江之縣而陰字誤爲陽也又清河侯王吸史記

作清陽地理志清陽屬清河郡而無清河縣表於汾陰侯周
昌下亦云比清陽侯然後知陽字誤爲河也弓高侯韓頽當
孽孫媯貴弟說以校尉擊匈奴封龍雒侯坐酎金失爵復
以橫海將軍破東粵封按道侯一人也表則畫龍雒爲名諲
按道爲名說攷紀傳並無名諲之人是表之誤平帝紀元始
二年立廣川惠王曾孫倫爲廣德王奉惠王後一人也中山
靜王勝傳則云元始二年立廣川惠王曾孫倫爲廣德王奉
靜王後廣川惠王越傳則云元始二年立戴王弟襄隄侯子
瘡爲廣德王奉惠王後是同時有兩廣德王矣表又云元始
二年廣德靜王榆以惠王曾孫戴王子紹封文則有榆瘡倫
三字之不同次則有戴王子戴王弟襄隄侯子之互異又一
奉靜王一奉惠王本紀不及中山表但列越侯倫榆字形相

近榆癘字聲相同是亦傳表之誤又終陵侯華毋害地無名
終陵者史記作絳陽注水經直指爲絳澮之陽攷表明云毋
害曾孫爲於陵大夫於字誤爲終也漢世列侯得之封國者
廢棄之後其子孫猶爵於其地如涅陽侯元孫之子爲涅陽
不更高宛侯元孫之孫爲高宛大夫廣阿侯元孫爲廣阿
襄南安侯曾孫爲南安讐襄皆是也是史記之誤於爲絳與
誤爲終實等耳又雷侯劉豨地無名雷者注水經作盧云縣
故蓋縣之盧上里攷地里志實作慮爲城陽縣表以豨所封
屬東海志城陽有慮縣東海有昌慮縣本一地所分其命名
之義猶昔與昔魁劇與劇魁之類是也若盧縣則屬泰山郡
是謂蓋之盧上里不得以慮爲盧又鄧侯蕭何地理志南陽
沛二郡並有鄧縣臣瓚據茂陵書以爲何封在南陽鄧攷何

與高祖同起豐沛所封應在沛郡因所作十八侯銘云文昌
四友漢有蕭何序功第一受封於鄜以鄜與何爲韻證之說
文解字則南陽縣作鄠沛郡縣作鄜何封在沛應作鄜也又
南宮侯張買子生嗣孝武時有罪爲隸臣攷買以高后八年
坐呂氏誅國除不應復有子嗣侯蓋宣平侯張敖子偃爲魯
王孝文元年改封南宮侯子歐歐子生以孝景中三年嗣位
十四年有罪免計其時正在孝武之世因偃亦封南宮誤以
偃孫爲買子也表以生爲偃之孫史記以生爲卽偃之子本
無侯歐一世地理志載侯國二百四十一唯山陽郡郛成齊
郡平廣北海郡饒琅邪郡掖麗二縣廣平國陽臺桂陽郡陰
山諸縣難攷山陽之郛成乃卽成之誤也宣帝以封王奉光
表以卽成屬沛陰說文解字卽沛陰地山陽沛陰地勢相及

又山陽本有郛邑在成武後漢改屬沛陰又易涉亂以此誤也齊之平廣卽舊川王子平節侯服也誤脫一字耳北海之饒卽膠東王子成康侯饒也攷康侯以地節四年與柳泉侯強樂望侯光同日以膠東戴王子分封地並在北海是以饒康侯名成誤作成康侯名饒耳表如藏鹵侯史記作鹵藏侯鹵鹵以字形藏藏以字聲自相顛惑本非一誤也琅邪之祊卽城陽頃王子所封也表則云挾釐侯霸誤祊爲挾麗則高密頃王子所封也表則云麗茲侯賜攷賜以建始二年與武鄉侯慶同封並在琅邪郡地廣平之陽臺卽平干王子愍所封也表作陽城唯桂陽陰山侯國實無據證水經沔水過陰山縣南注縣本陽山也縣東北猶有陽山故城卽長沙孝王子宗之邑也改曰陰山縣攷地里志陽山陰山並爲侯國無

陽山改爲陰山之說表明云陽山侯宗是明有兩人應從缺疑之例水經注每以王侯國邑引攷水地多所紛亂如云蘄水東逕建成縣故城北武帝封劉拾爲侯國王莽之多聚也攷地里志沛豫章二郡俱有建成縣沛郡之建成宣帝以封黃霸豫章之建成武帝以封劉拾實不同也王莽改多聚之建成爲豫章縣蘄水所逕之建成爲沛縣亦異注乃誤合爲一又乘邱侯劉將夜以泰山郡乘邱縣當之又云齊魏交戰之地攷史記作桑邱侯趙世家云肅侯廿三年與齊魏戰於桑邱括地志桑邱故城在易州遂成縣界將夜以中山王子分封不應遠在泰山作桑邱爲是又東安侯劉強表在東海乃云時密水逕東安城南漢封劉強爲侯國攷時密所逕之東安在城陽國與東海郡之東安自是二縣強封不在城陽

又橐侯陳錯云泗水逕高平縣故城西宣帝地節三年封魏
相爲侯國高帝七年封陳錯爲侯國攸橐山陽之屬縣也地
里志作橐莽曰高平臣瓚曰章帝更名高平橐之爲高平聲
相近而改後漢書東平憲王傳亦作橐應以橐爲正魏相所
封之縣在臨淮郡不與陳錯同又樂陵侯史高臨淮縣也而
以爲平原之樂陵樂成侯許延壽南陽縣也而以爲東郡之
樂平卽清縣安昌侯張禹汝南縣也而以爲沙溝水所逕之
安昌城在武德縣方陽侯孫寵龍亢鄉也而以爲潁水所逕
之房陽城在酈縣北又司馬貞釋史記亦多不實如陽都侯
復城陽縣也海陽侯搖井餘遼西縣也曲成侯蟲達東萊
縣也昌武侯單甯膠東縣也戚侯李必東海縣也而皆云漢
志缺廣嚴侯召歐云晉書地道記廣縣在東莞而不知志在

齊郡臺侯戴野云臨淄有臺鄉縣而不知志在濟南成陽侯
奚意云縣屬汝南而不知屬汝南者爲陽成縣不名成陽成
陽實在濟陰平都侯劉到云縣在東海而不知屬東海者爲
都平不名平都平都實在上郡龍陽侯陳畧史記只作龍注
水經云卽春秋齊侯圍龍之龍而云廬江龍舒縣平陸侯劉
禮陳留風俗記以爲在尉氏而云西河縣又東平東平陸縣
平州侯昭沙掉尾西河縣也地里志作平周路博德傳作平
州而據晉書地道記屬巴郡白石侯劉雄渠張守節以爲故
城在德州安德縣北三十里爲齊悼惠王子分封是也而云
金城縣若此之類旣不細攷其原又或妄舉其處反覆證引
誣莫甚焉至顏籀則本所不詳後人亦莫斥其過漢書自韋
昭應劭蘇林如淳之徒注者不下數十家皆能攷證原流自

顏氏出而埽而空之班氏之學自顏氏而始壞夫讀經先求文字繼求詁訓文字詁訓正則制度始詳讀史先攷地里繼攷世次地里世次定則事迹乃實不此之講而空言無補矣
垢旣無穎悟之資又乏精勤之學嘗謂信心不如信目諸所攷證皆目所經定不因心所記憶質之巨儒當有所據改焉

復王德甫書

趙文哲

十四日戌刻接到手札屬考狼居胥山卽先檢史記漢書霍去病傳及司馬通鑑朱子綱目又綱目釋地等書並有封狼居胥山禪於姑衍登臨翰海等語而各書皆無註解惟大
清一統志喀爾喀部載此山名其註亦引漢書又有燕然實
顏金微等諸古名山又載番語諸山有拖諾山註載
聖祖曾駐蹕於此俱在喀爾喀部但諸番名之山或云卽古

某山而狼居胥無今名可指似今猶呼爲狼居胥者似不無可疑竊按水經於河水所歷其間爲衛霍與單于戰地若臯蘭高闕諸地酈註瞭如而絕不及狼居胥等名似此山遠於西而近於北故去病傳蒙出代右北平爲說也自應在今北路軍營所指向之地又一統志言陰山橫亘西北起寧夏賀蘭山北爲喀卜特兒山又東北爲喀兒占布兒古圖山又東北爲狼居胥山又東北爲翁金朔龍山當河套外正北今若能將狼居胥連界之山確考其某地則此山亦可定其方位無如喀爾諸山一統志又參差互異一時不能考定只有一賀蘭山似可據依因再考一統志輿圖賀蘭狼居胥相去不遠拖諾在其北翰海又在其北

聖祖旣臨拖諾則當日經過狼居胥似可臆揣但曾將平定

朔漠方略草草繕閱似未見狼居胥之名不知方略記略中此山果何所本又約略輿圖及方略似

聖祖之出狼居胥應在第二次北討之時而今記略說在第三次內益不敢定其爲今之某地某山矣顧氏方輿紀要最爲詳密而此書倉猝無從告假迫於發報草此先復祈卽轉稟金壇師相自慙弁陋無以仰塞下問之意容借得書籍細加考核或更有以報命至現在通鑑輯覽狼居胥註在今漠北喀爾喀蓋亦本一統志云爾弁以奉聞

再復王德甫書

趙文哲

昨者承詢狼居胥山迫於裁荅了不得其要領後於新舊唐書方輿記要及一統志中反覆考索似略有影響然若指今之某山以實之則仍不能也敢復陳於左右冀賜裁定按方

輿紀要狼居胥山列之山西省附考中云在漠北漢元封四年霍去病出代右北平二千餘里歷度難侯之山濟弓盧之水封狼居胥山禪於姑衍登臨瀚海而還宋元嘉二年六年帝欲經略中原王元謨每獻籌策帝曰令人有封狼居胥山意謂此事也紀要所載如此則此山在今代州以外直北無疑其坐落之地惟唐之烏德健山似之一名都尉健山細按要與一統志並同唐書薛延陀傳樹牙鬱督軍山直京師北六千里復率其部稍東保都尉健山獨邏水之陰遠京師才三千里而羸東室韋西金山南奚厥北瀚海古匈奴地也後回紇亦建牙於此其山南距漢高闕塞一千七百里夫高闕爲衛青與匈奴戰地去此山尙千七百里若果卽狼居胥山周宜去病當日功似多于青矣則距長安當三千餘里謂出代郡二千里者庶幾近之又山旁有獨邏

水亦名獨樂水疑卽弓盧之轉音一統志言溫毘河獨邏河東北流至衙帳東北五百里合流又唐書言保都尉犍山獨邏水之陰夫衙帳近山獨邏北流至之則水在山南明矣合之唐書言水陰則山在水北又明矣又唐書言此山南爲突厥北爲瀚海則與漢書先言濟弓盧後言封狼居胥後言登臨瀚海似乎有合又唐置狼山都督府以統漠北高宗東封泰山狼山都督葛邏祿社利等並扈從此狼山或卽從漢之狼居胥得名若以漢書地里志右北平白狼當之則白狼山在今喀喇沁界喜峰口東北在唐業置饒樂都督府於此不應重取此爲名且與漠北亦遼矣此外亦更無以狼名山者况唐所置都護都督如瀚海金微陰山等名皆在今喀爾喀部中而烏德犍山亦同部似可約略定之至烏德犍山現在

何地一統志謂當與今之杭愛山相近似亦可信蓋唐書所

言烏德健西至金山金山卽今之阿爾泰山烏德健山北有

仙娥河唐有仙夢州在狼山都督府相近疑卽此聲之轉卽色楞格河而阿爾泰山

東北接杭愛山北至色楞格河約略求之其方位頗不相戾

特自元以後以蒙古語改易山川名目漢唐舊稱無從考證

此惟據道里方位約略計之穿鑿附會之譏知所不免惟望

博雅君子爲之證其謬悞爲幸託素好故敢瑣及耐圃先生

前似不堪上達也又昨與朱竹君編修談此渠疑狼居胥卽

唐之鬱督軍山蓋據唐書突厥傳高俤擒突厥詔處餘衆於

鬱督軍山建狼山都督府以統之謂此狼山卽因漢山得名

也但鬱督軍山唐書言去長安六千里恐與漢書所言不合

又朱札言山南有溫毘水溫毘卽弓盧之轉語溫毘今一統

志俱作溫毘朱言溫毘必別有所據匆匆未及再叩也又方
輿紀要云鬱督軍山卽烏德讐山朱蓋據此爲斷故其里數
與漢書仍不背謬然唐書言六千里又何也統祈高明政之

答袁簡齋書

錢大昕

得手教循環雅誦懽喜無量先生研精史學於古今官制異
同之故燭照數計洞見癥結而猶虛懷若谷示以所疑俾馬勃
牛溲得備扁和之采其爲榮幸非所敢望謹就問目述其一
二惟先生詳察天檢校兼守判知之名皆起於唐但唐初所
謂檢校者雖非正授卻辦本職事如檢校侍中檢校中書令
檢校納言檢校左相之類皆列於宰相表與正授者無別而
宇文士及檢校涼州都督魏元忠檢校并州長史亦是實授
其任蓋內外各官皆得有檢校若今署事矣中葉以後諸將

多以軍功得檢校官三公三師僕射尙書常侍車載斗量有名無實故唐書宰相表三公三師七十一人檢校之公師不與焉猶使相之不列於宰相也而自公師兩僕射六尙書兩散騎常侍太子賓客國子祭酒而外它官亦罕有除檢校者宋史所列檢校官一十有九蓋卽沿唐末之制矣公師之班首太師次太尉次太傅次太保次司徒次司空王建由檢校太師纔遷司徒曹份以檢校太師守司徒又數年始除守太保然則檢校太師尙在真三公之下也若夫行守試三者則以官與職之高下而別長編載元豐四年詔自今除授職事官並以寄祿官品高下爲法高一品者爲行下一品者爲守二品以下爲試品同者不用行守試偶檢柳公權書符璘碑其題云輔國大將軍行左神策軍將軍輔國大將軍階正二

品左神策將軍官從三品此高一品爲行之證也其結銜云
朝議大夫守尚書工部侍郎朝議大夫階正五品侍郎官正
四品此下一品爲守之證也五代時李琪爲宰相所私吏當
得試官琪改試爲守遂爲同官所糾此試不如守之證也判
與知之分則宋次道春明退朝錄所云品同爲知隔品爲判
者得之宋初曹翰以觀察使判潁州蓋用隔品爲判之例後
來惟輔臣及官僕射以上領州府事稱判其餘皆稱知不稱
判矣判知之外又有云權發遣者則以其資輕而驟進故於
結銜稍示區別程大昌云以知縣資序隔二等而作州者謂
之權發遣以通判資序隔一等而作州者謂之權知是也宋
制六曹尚書從二品而權尚書則正三品侍郎從三品而權
侍郎從四品則權與知亦大有別矣元祐元年文彥博落致

仕加太師平章軍國重事潞公本以守太師致仕今復召用
故有落致仕之命同一落也落職則爲罷免落致仕則爲復
用其云落者謂結銜內去此字也元豐三年彥博落兼侍中
除守太尉蓋其時改官制以侍中中書令爲宰相職事官非
退閒者所宜授故落侍中而進太尉以寵之亦非罷免之謂
也富弼呂公著之守司空與蔡京之司空皆眞三公也而京
不云守則尤貴三公初拜有臨軒受冊儀宋時居此職
者皆固辭而止若檢校官固無所謂冊拜也差遣之名惟宋
時有之宋時百官除授有官有職有差遣如東坡以學士知
定州知州事差遣也端明殿學士職也朝奉郎則官也差遣
罷而官職尙存職落而官如故古之優禮臣工如此非有大
罪斷無儕於編戶之理至明而待士之禮薄矣方密之謂古

宰相無印支俸皆借翰林院印此特謂明之大學士耳唐宋
宰相皆有印故有分曰知印之法其文曰中書門下印元中
書令左右丞相皆銀印若明之大學士本無宰相之名然亦
未嘗無印明史內閣銀印直紐方一寸七分厚六分玉箸篆
文其文曰文淵閣印但文移用翰林院印不用此印而方遂
以爲無之耳 本朝大學士無印文移用內閣典籍廳印卽
明之翰林院典籍也明之閣臣皆出翰林故典籍卽爲內閣
之屬今改典籍隸內閣而翰林院別設典籍稍區而二之矣
隋書百官志官一品每歲祿八百匹二百匹爲一秩雖未明
言何匹總檢下文有云祿率一分以帛一分以粟一分以錢
則匹當是絹匹之匹非馬匹也尊集體大思精直追唐宋作
者蒙委讐校謹就鄙見所及證據一二開具別紙畧畧恐勞

起居得雨稍涼當走謁不宣

再答袁簡齋書

錢大昕

蒙詢秦漢賜爵及唐同三品之稱謹按賜爵始於商鞅以旌首功漢時或以匭功或以入粟入錢得之而賜民爵一級或二級三級史不絕書大約公乘以下與齊民無異五大夫以上始得復其身民賜爵者至公乘而止爵過公乘得以與子若同產同產子有罪得贖貧者得賣與人宣帝求漢初功臣之後復其家史稱皆出庸保之中及攷之表則或云公乘簪褭或云公士上造大率皆有爵者雖擁高爵尙雜庸保爵之冗濫如此至五大夫以上則以賜中二千石至六百石之勤事者及列侯嗣子然攷之史漢自卜式桑羊而外書賜爵者寥寥非無爵也賜爵不足爲榮史家略而不書也民爵不過

公乘而入粟之法行則有至大庶長者大庶長去關內侯一級耳然鬻爵而不鬻官官有員爵無員此鼂錯所謂出於口而無窮者也先生謂普賜天下民爵自惠帝始旣云普矣將人人有爵又賣與何人愚攷之紀多云賜民爵戶一級或不云戶者史家省文師古曰賜爵者一家之長得之也一戶惟賜一人子姓昆弟皆不得與固無嫌賈用不售矣唐初以侍中中書令爲宰相此二官者皆三品也然它官亦有三品階故入相而官未至侍中中書令者必云同中書門下三品其資望稍輕者則云同中書門下平章事大厯以後升侍中中書令爲二品自後入相者但云平章事無同三品之名矣當時除三公者固不乏人未嘗以三品爲限但三公不必知政事而居宰相者不皆二品以上官中葉以降並有除侍中中

書令而不入政府者矣若謂官不得過三品唐志本無此文也區區所聞惟先生決其然否

湖海文傳卷四十二

湖海文傳卷四十二

湖海文傳卷四十三

青浦王 利德甫輯

書

荅大興朱侍郎書

錢大昕

蒙閣下垂詢以國語伶州鳩言武王克商歲在鶉火此周人
述周事必無差誤而它書或云歲在己卯或云辛卯似不相
應大昕嘗習劉子駿三統術於國語所云歲在鶉火日在析
木之津月在天駟辰在斗柄星在天龜者推驗其時曰次度
無不脗合古法歲星與太歲常相應歲星自丑右行太歲自
子左行歲移一次周則復始如歲星在星紀則太歲必在子
歲星在鶉火則太歲必在未三統術上元起丙子歲依歲術
步之則武王克商之年當直辛未孔穎達詩正義云文王受

命十三年辛未之歲殷正月六日殺紂孔疏所言與國語歲在鶉火之文正相合矣自周受命以後至於秦漢皆有紀年可攷非若夏商以前之茫昧而後人譜紀年者皆以周克殷爲已卯歲相較差八年者蓋古術太歲與歲星皆有超辰之法歲星百四十四年而超一辰則太歲亦超一辰積年逾久則超年亦漸多今人以漢高帝元年爲乙未武帝太初元年爲丁丑而班孟堅於漢元年引漢志曰太歲在午於太初元年引漢志曰歲名困敦孟堅所引者西京之注記則西京猶用超辰之法而東漢臺官已鮮知之故虞恭宗訴輩言太初元年歲在丁丑又言歲無由超辰蓋太歲不用超辰昉於東漢而相沿到今以今法溯古年則武王克商固宜在己卯矣然鄭康成注馮相氏十有二歲云歲星與日常應太歲月建

以見然則今術太歲非此也今之太歲異於古之太歲鄭於
周禮注中已明言之非大昕臆說也呂氏春秋維秦八年歲
在涒灘以今法推之秦始皇八年當爲壬戌而云涒灘相差
兩年亦以太歲超辰故也超辰之法廢於東漢東漢距西漢
尙在百四十四歲以內故差止一年其距秦始皇則已在百
四十四歲以外故差至二年積至周初已闕千有餘歲故差
至八年以今法言之則已卯歲本不誤而在古法則必爲辛
未不得爲已卯若竹書辛卯皇甫謐乙酉之說則誕而不足
信矣閣下謂歲星在午則太歲爲作噩此據淮南天文訓史
記天官書之文然淮南言太陰史公言歲陰俱不言太歲太
陰卽歲陰也亦周行十二辰而常在太歲後二位古人制攝
提格以下十二名本言太陰所在而後人移屬之太歲失其

舊矣何以言之淮南云太陰在酉歲名曰作鄂歲星舍柳七星張以六月與之晨出東方夫柳七星張者鶉火之次也六月日在鶉火歲星與日同出東方是月斗建未而太歲亦在未故鄭注馮相氏謂太歲者歲星與日同次之月斗所建之辰也而歲名則曰作噩此古人以太陰紀歲不以太歲紀歲之證也推之十二月盡然淮南雖未明言太歲所在而其上文云太陰在寅寅爲建子爲開主太歲則知太歲之非太陰又知太歲常在太陰之前二辰矣以淮南史公紀歲之例推之則謂周克商之歲歲名作噩固可要是太陰所在非太歲所在也漢太初元年史記以爲闕逢攝提格之歲此以太陰言之而班史謂歲名困敦則指太歲所在讀史漢者往往於此致疑其實無可疑也東漢以後術家不用太陰但用太歲

又去其超辰之法于入算雖便捷而古書之難通者多矣鄙
著史記攷異曾一及之而語焉不詳茲因閣下之詢爰述所
聞以對惟幸裁察

與孫淵如書

錢大昕

尊集中太陰攷一篇不信太陰與太歲爲二蓋用張揖廣雅
之說愚謂古人旣以太陰紀歲天官書又謂之歲陰卽以當
太歲似無不可然漢志述太初改元事旣云復得闕逢攝提
格之歲又云太歲在子則當時實以太陰紀年而別有太歲
昭然察矣乃自太初而後以太陰紀年者僅見於天官書甲
子篇而劉歆三統術無推太陰法卽翼奉封事亦似以太陰
當太歲則自太初改憲而闕逢十名攝提格十二名移於太
歲相承已久稚讓魏人安得不云爾乎足下謂淮南紀歲星

出月在史漢前兩月以爲淮南之誤按淮南太史公皆以太陰紀歲漢志則以太歲紀歲兩法不同漢志依太初術太歲在寅則歲星在營室東壁以正月晨出東方所謂歲在姬訾也太歲在卯則歲星在奎婁以二月晨出東方所謂歲在降婁也推之十二辰皆然此真太歲所在也淮南史公所謂攝提格歲者太陰在寅太歲本在子也其歲歲星舍斗牽牛卽星紀之次當以十一月出東方淮南之文本無誤而史公云正月者以天正言之其實與淮南無別也漢志與史公文同而實異依石氏則與史公不異但淮南與史公文異而實同當云歲陰不當云太歲也知太陰太歲之有別則相說以解矣古法太歲左行於地歲星右行於天其相應與月建月將之相應同鄭康成注周禮歲謂太歲歲星與日同次之月斗所建之辰也今按歲星舍

斗牽牛爲星紀丑宮十一月日躔星紀是爲歲星與日同次之月其月斗建在子吾是以知太歲之本在子也而淮南史公明云攝提格歲吾是以知太陰太歲之必有別也淮南云太陰在四仲則歲星行三宿在四鈎則歲星行二宿與天官書正合晉灼改太陰爲太歲遂有兩歲之差矣淮南斗杓爲小歲咸池爲大歲大與小對今本亦作太歲此轉寫之譌非別有太歲如世俗所云月太歲也漢碑歲在戊午名曰咸池者咸池右行四正子午卯酉皆咸池所在也足下所撰太歲歲星左右周天圖依天官書次之但可云太陰或云歲陰若指爲太歲則恐未合於古且與鄭康成亦相矛盾歲星十二年而一周天不過約其大率其實歲行一次尙有餘分積至百四十四年而行百四十五次古人謂之超辰服虔謂有事

於武宮之歲龍度天門此超辰之證也足下不信歲星有跳
辰則左氏所紀歲在之文不幾前後不相應乎古法不獨歲
星有超辰而太歲亦有之自後漢四分術行而太歲無超辰
之法相沿到今然通儒如鄭康成者猶能言之故有今秣太
歲非此之語卽如淮南元年太一在丙子以今法推之當爲
丁丑漢太初元起丙子後人亦命爲丁丑蓋其時距後漢百
有餘年當超一辰故也呂氏春秋維秦八年歲在涒灘高氏
謂秦始皇卽位八年也以今法推之當爲壬戌而云涒灘者
秦初距後漢二百餘年當超兩辰故差二年也又溯而上之
武王克商歲在鶉火先儒以爲辛未歲見孔穎達疏而今人命爲
己卯自周初至後漢千有餘年當超八辰其年數固無多寡
也古人不以甲子紀歲亦以太歲有超辰無一定之繇枝不

如歲星之垂象章章可稽耳後代棄超辰之法而歲星不與太歲相應則用歲星誠不如用太歲之簡易然而古書之難通者遂多則古法不可不講故願與好古君子盡其同異唯足下幸教之

荅孫淵如觀察書

錢大昕

得四月六日手教并示荅江處士書稿所云西法每事必與古聖相反誠切中歐邏巴之病至論中星斗柄之同異則僕非專門不敢措一詞僕近日好言輿地不言象緯以目眊夜不能見星知於此事無緣耳史記十二諸侯年表始其和元年終敬王四十三年今刊本有庚申及甲子字足下斷以爲史遷正文詆古人不以甲子紀元之說僕思之恐有未安古術百四十四年而超一辰則共和元年必不直庚申東漢以

後術家不用超辰徐廣晉人以其和之初爲庚申固無足怪
但不可以誣史公耳太陰太歲之辨尊見旣與鄙意不合僕
今亦不復言各尊所聞聽後賢決其然否獨於此猶復饒舌
者則以六國表周元王元年徐廣曰乙丑秦楚之際月表秦
二世元年徐廣曰壬辰後兩表之干支皆徐所注則此表之
干支必出於徐無疑也其最上列干支一格殆宋以後校刊
者妄增後兩表亦無之攷徐注之例惟於每王元年紀干支
此表第一格每十年輒書甲戌甲申甲午甲辰甲寅甲子字
顯係後人所爲意在便於尋檢不特非史公本文并非徐意
也足下所言將以取信士林不當留此罅隙故復陳芻言以
備采擇

前遇足下於曉嵐所足下盛稱婺源江氏推步之學不在宣城下僕惟足下之言是信恨不卽得其書讀之頃下榻味經先生邸始得盡觀所謂翼梅者其論歲實論定氣大率祖歐邏巴之說而引而伸之其意頗不滿於宣城而吾益以知宣城之識之高何也宣城能用西學江氏則爲西人所用而已及觀其冬至權度益啞然失笑夫歲實之古強而今弱也漢以前四分而有餘漢以後四分而不足而自乾象以至授時歲實大率由漸而減此皆當時實測非由臆斷故以古法下推則必後天由於歲實強也以今法上攷亦必後天由於歲實弱也楊光輔郭守敬輩知其然故爲百年加減一分之率以消息之雖過此以往未之或知而以之攷古則所失者鮮是其術未始不善也西人之術止實測於今不復遠稽於古

然其所謂平歲實者亦復累有更易則固非以爲永遠可守之歲實也江氏乃叔爲本無消長之說極詆楊郭以傳會西人然史冊所書景長之日班班可攷難以一人手掩盡天下之目也於是爲定冬至加減之說以加之而仍後天也於是又爲本輪均輪半徑古今小之說以加之而仍後天也詞遁而窮則直斷以爲史誤毋乃如公孫龍之言臧三耳甚難而實非乎天道至大非一時一人之術所能御日月五星之行皆有盈縮古人早知之矣各立密率以合天行郭太史之垛積新法之本輪均輪次輪皆巧算非真象也約加減之數而假象以爲立算之根合則用之小不合則增減之大不合則棄之本無輪也何有於徑本無徑也何有古大而今小且夫兩輪半徑之數之減也西人固疑其初測之未

合而改之非定以爲古多今少之率也就如江說兩半徑古大而今小則仍是楊郭百年消長之法以矛陷盾其何說之辭夫以兩春分攷歲實較之兩冬至爲近然小餘二四二一八七五者回回之舊率而地谷所用也崇正時嘗改爲二四二一八八六四矣今則又改爲二四二三三四四二矣只此百年之中西士已不能守其舊率而江欲以地谷所用之數上攷千載以前謂必無消長也有是理乎本輪均輪本是假象今已置之不用而別覓橢圓之率橢圓亦假象也但使躔離交食推算與測驗相準則言大小輪可言橢圓亦可然立法至今未及百年而其根已不可用近推如此遠攷可知而江氏取其已棄之筌蹄爲終古之權度其迂濶亦甚矣西士之術固有勝于中法者習其術可也習其術而爲所愚弄不

可也有一定之丈尺而後可以度物有一定之衡石而後可以權物今江所持以衡量者有一定乎無一定乎言平歲實則其數可多可少也言最卑行則其行忽遲忽疾也言輪徑差則借象而非真象也以槃爲日而詆羲和以錐指地而嗤章亥持江氏之權度以適市必爲司市所撻矣向聞循齋總憲不喜江說疑其有意抑之今讀其書乃知循齋能承家學識見非江所及當今學通天人者莫如足下而獨推江無異辭豈少習於江而特爲之延譽耶抑更有說以解僕之惑耶請再質之足下

上錢竹汀少詹問七政諸輪書

焦循

循頓首循所呈釋弧三卷蒙賜覽並作敘文揄揚太過不勝愧謝之至所敘正第五十五圖細審乃循之誤當卽於燈下

改正蓋戴君用矢半較捷於用加減非梅君之說不可據也
循家於揚郡之北鄉孤陋無師學拘執之見得大儒不棄進
而教之尤所感而自慶耳循又爲釋輪二篇明七政諸論所
以用弧三角之理以有數處未能了然尙未脫稿敢以所疑
就正有道梅君論次輪上之實體譬向太陽推之五星誠有
然者若太陰之次輪行倍離所云向日者其止謂爲太陽所
攝恒行離日之倍度非謂其體之向太陽耶且五星之歲輪
與日天同大其歲輪繞日軌迹爲伏見輪與本天同大今月
之次輪視均輪尤小旣行倍離則其軌迹不能成圈與本天
同大意者五星與日有定距太陰次輪與星有不同者與又
火星之歲輪半徑忽大忽小有本天高卑及太陽高卑之差
星與太陽同在最高與同在最卑其相距甚異梅君火星本

法云火星兼論太陽之高卑要不能改其徑綫之大致今以求法考之以均輪所當之矢爲兩差之比例以相加則其徑綫隨本輪矢之高下爲高下有不能不改其大致者矣江慎修布衣言諸星歲輪應日之本輪火獨應日之體故有太陽高卑按高卑之差惟有不同心之異其輪則同心今推求火星次輪之法在最卑時其半徑爲最小稍離乎最卑之左右增損一分一秒則本輪之矢隨之而長卽半徑之度隨之以增規此成圖必大于本圈而不同於不同心圈與伏見輪之狀或者火星之次輪本割入太陽天內高卑之差緣是以起然又無從得其貫通竊思地谷以來諸輪之設或左行或右行或倍行或三倍行或自遠或自近或自平遠或以本輪爲心大率皆以實測所得之數假爲法象以曲求其合故不能

比而同之也循愚鈍多疑惑往往始見覺其易明再三思之
荆棘頓起惟望大儒指其迷而予之以天道潔已以進聖人
所內望明教之幸甚又賜教稱李君銳推步之學甚精循冬
月回揚過吳時當請見之幸爲道及鄙意循叩頭叩頭

復李尙之言天文推步書

焦循

循頓首尙之仁兄足下蔣山使者來浙得讀三月十五日札
備悉所著書不勝敬服昨阮學使試杭屬優生有海甯陳君
名鱣者論史學云天文度數有定似難而實易地理博采志
乘似易而實難陳君蓋不知天文推步之術者推步之學自
三統歷十三家至元郭守敬作授時術明大統依之徐氏輯
新法律書西漢漸備于是地谷穆尼閣噶西尼之徒各運其
巧思積久而密後之學者或執中以闢西或用西而謗中或

援西於中或以中證西互持其理叢積不一兄願通二十四
史以言中通唐九執以來之術以言西各明其由疎而密之
漸此書若出可集推步之大成可令論史者知天文之難爲
真難而非區區郡縣之沿革一檢錄卽得者所可較其難易
也九章等術所以然之故前人頗言之而未能了然循嘗以
推祿之妙其轉移變化惟在加減乘除自九章距測以及弧
三角矢較橢圓諸法皆不外四者之用鄙意欲通爲一編以
四者爲之經而運會其所以用之故庶可馭繇于簡言歸于
要前冬擬爲之以遠出至今中輟正思續完此書或可與兄
之願相爲表裏否蓋循于是學識淺而多滯機惟思以今時
所用者于其深奧宜殫之處顯之令明淺易了俾家塾子弟
可由是入門則凡交食留退之故共知其所當然不致日居

天之中而仰面茫如也自己酉以來方讀梅氏少廣拾遺卽
爲乘方釋例五卷因學掇園卽爲釋掇因學弧三角卽爲釋
弧因學交食及五星諸輪法卽爲釋輪釋交其雜述類聚之
文又二三十篇皆就已之所已明者言之爾兄願于數千年
中西疎密之原彙而貫之此實從來未有之書亦宇宙內斷
不可無之書循所樂之而力不能爲者以兄之學力赴兄之
所願必成無疑惟是不朽之業鬼物所忌富貴利祿疾病困
乏或順或逆皆所以阻撓乎我以爲之魔敢爲兄戒之身外
之事聽其自來卽學問中六書音均訓故典章之要亦乞待
之于書成之後專于所願務期其成將見勿庵梅氏開其始
吾兄統其成眞三公不易之榮矣愛之切服之深而立言遂
至於無狀望諒而誨正之是幸

答孫符如同年書

凌廷堪

都門一別歲實六周時於維君處詢悉道履綏康爲慰昨子畏令弟見示手書發函伸紙如聆言笑并稔著述日富欣抃奚似廷堪自問百無一長乞此冷官以爲養親之計離羣索處同志者稀向所沾溉於友朋者遺忘幾半方深不殖之虞乃荷獎藉勤勤過相推許殊增顏汗也年來從事算學本欲借此以消暑漏何敢遽望有成不謂道路之口遂聞左右且懼且慚夫西人之學最難者爲弧三角而難中尤難者爲斜弧三角梅氏之書欲天下後世共明其理故往往論多於法而法取其備又往往各書中參差互見不嫌於複如斜弧兩邊夾一角求對角之邊也弧三角舉要中既有垂弧法又有垂弧捷法環中黍尺中又有先數後數法初數次數法加減

法甲數乙數法加減捷法加減又法而三邊求角環中忝尺
亦具此數法其實便於用者祇加減捷法而已今休寧戴氏
於加減捷法內改用兩矢之較不用餘弦則尤捷而便也又
如有相對之邊角而求角無對角之邊求邊無對邊之角舉
要中垂弧法則分爲二一先有一角二邊而角與邊對一先
有一邊二角而邊與角對算殊繁重發源江氏則併爲一法
先用邊角比例法求得一邊或一角再用舉要中正弧三角
黃赤二切綫法求得兩分邊合之則得餘一角較原法省作
垂弧而復簡易又兩角夾一邊舉要中亦有垂弧法更繁重
江氏則以角易爲邊邊易爲角用加減捷法一求而得此蓋
於次形中悟得之者然則梅氏之書詳則詳矣而初學不無
苦於望洋也今約而言之不論角之鈍銳邊之大小而斜弧

三角六類可盡一曰兩邊夾一角則用戴氏法一曰兩角夾一邊則用邊角相易法一曰邊角相對有對所求之邊角則用邊角比例法一曰邊角相對無對所求之邊角則用江氏法一曰三邊求角亦用戴氏法一曰三角求邊亦用邊角相易法內兩角夾一邊邊角相易即兩邊夾一角法三角求邊邊角相易即三邊求角法而兩邊夾一角又即三邊求角之反其率者四類皆同用戴氏之加減捷法所謂六類者只三法而已會通之後固較若列眉也至其三率比例精密巧妙誠非刑臺弧矢割圓所可及者妄欲撮其旨要勒爲一書名曰弧三角指南俾初學易得門徑然後再取梅氏之書讀之亦行遠自邇登高自卑之義因有事禮經尙未遑屬草也竊謂近者學術昌明士咸以通經復古爲事未有遺議而一二

空疏者流聞道已遲向學無及遂乃反脣集矢謂工文章者不在讀書淪性靈者無須考證此與臥翳桑而侈言屏膏粱下蠶室而倡論薄女色者何異不知容有拙於藻績之儒林必無昧於古今之文苑也來教所云某君其弊似亦類此所謂道不同不相爲謀者也書不盡言廷堪再拜

與焦理堂論宮室書

江聲

聲謹啟理堂先生足下竊惟三代制度經秦火之後蕩然無存漢興以來羣經漸出亡佚頗多以今日而考古之宮室蓋綦難哉大著群經宮室圖徵引浩博考核詳明善矣以聲之愚蒙豈能窺其厓涘而意見有不合不得不爲之辨非好辨也蓋大著昭垂於後後人必奉爲圭臬猶今人圭臬經傳一也如或不審無乃詒誤安能默默已乎爾雅曰兩階間謂之

鄉朝無屋何有階兩階間是路寢庭矣是燕朝矣鄉者君視燕朝所立之位也下云中庭之左右謂之位是羣臣之位也路寢有屋故中庭字从广朝無屋故朝廷字不从广說文云廷朝中也庭宮中也二字固不同也尙書盤庚悉至于庭褻在王庭隸古定本是廷字唐天寶中衛包皆改作庭蓋唐人已不知朝中無屋矣下云門屏之間謂之宁門謂路門也屏則雉門內之屏也路門外至雉門內之屏爲宁是正朝矣寒家有異宗之慎修先生言門屏之間謂之宁專就諸侯內屏而言若天子屏在應門外則當路應兩門間爲宁矣此說的確不刊者也李巡云正門內兩塾間爲宁正門內是也兩塾間非也蓋朝方百步塾安得有百步之深朝豈僅如應門二徹參簡之廣乎故曰非也其曰正門內者于天子爲應門于

諸侯爲雉門此則是也寧在是則屏亦在是如以屏移于路門內謂屏外路門內爲門屏之間則爲地幾何而足容卿大夫士之班位乎且三門三朝門各一朝安得路門內有二朝乎其不然明矣論語過位包氏云過君之空位蓋君日出而視朝旣而退適路寢則位空矣包氏不誤也下云復其位復當作復行故道也故孔氏云來時所過之位亦不誤也自有朱子趨走就位也一言人遂認其位爲臣位是朱子詒之一誤也朱子解過位爲君之虛位原不誤乃堅執其位爲臣位因孔氏注而非過位亦以爲臣位若是臣位孔子何爲色勃如足躩如蹢躅如乎豈治朝無君位乎是二誤矣且此是治朝與燕朝無涉乃謂此位卽燕朝中庭左右之位是三誤矣又玉藻曰君入門介拂闌大夫中楨與闌之間士介拂楨鄭

注云此謂兩君相見也君入必中門上介夾闈大夫介士介雁行于後示不相沿也案兩君相見入門必主賓偕入賓有介主必有擯經不言擯者可知故省也鄭云上介夾闈實與上擯夾之不言上擯者亦如經文以可知故省也衆介雁行於後是從君於闈西入也賈公彥以下文云賓入不中門與大夫中棖與闈之間牴牾遂疑爲二闈之說云主君與賓並入主君於東闈之內賓於西闈之內並行而入上介於西闈之外上擯於東闈之外皆拂闈次擯次介皆大夫中棖與闈之間末介末擯皆士各自拂棖如其說則擯介皆不在君後矣據鄭云雁行於後鄭君不謂有二闈也賈氏臆說非也王藻正義引崔氏皇氏並云君必中門者謂當棖闈之中主君在闈東賓在闈西主君上擯在君之後稍近東而拂闈大夫

擯介各當君後在棖闌之中央此說是也蓋從君與親自爲賓不同從君而入其事在君從者排列於後有左有右自必有中無所嫌也臣自爲賓雖亦有介或皆拂闌魚貫而入或賓拂闌衆介拂棖禮無明文不敢臆度惟知不當棖闌之中爾又士冠禮說洗直於東榮鄭注云榮屋翼也周制卿大夫爲夏屋燕禮設洗僅於阼階東南當東霤鄭注云當東霤者人君爲殿屋也鄭言夏屋者夏大也猶言大屋爾非謂夏時之屋也夏屋兩下之屋南北有霤東西則無故言東榮殿屋則四面皆有霤故言東霤蓋霤出於榮外非卽榮也榮止有二霤則或二或四卽四霤之屋亦止二榮也斯干詩云如鳥斯革毛公云革翼也是所謂榮矣下別言如翬斯飛是則霤之四角翹起者也則霤與榮有別矣鄭注不誤也喪大記升

自東榮必在東榮直南之檐降自西北榮必自西榮直北之檐蓋升降於屋必從檐之垂下處爲便榮是屋脊之兩頭起者勢不便於升降卽四霑之屋亦必從東南角之少西西北角之少東屋檐垂下處乃可升降其四角飛起之處勢亦不便也鄭注云天子諸侯言東霑則君與夫人二語不爲虛設不得以此駁鄭君也凡此諸條惟先生詳之若夫城涂壇學之等可稱精細無遺議矣明堂之制拙刻尙書中有圖有說先生曾見之否如有謬誤幸賜訓示

復江艮庭處士書

焦循

循謹復艮庭先生閣下循所爲羣經宮室圖一書乃庚戌年授徒深港時所作旣而病嘔血醫者以爲中死法同學及門人輩以此付刻原稿于正書中偶雜古體當時未及改正至

今頗悔之顏黃門陸博士所言皆通論也昨接台札指摘是書俚俗之字循承教感謝之極其大俗如尊所斥者當檢出改之爾又來札稱鄙作徵引浩博考核詳明城涂壇學之等可稱精細無遺議循欣慰無地叩頭叩頭又蒙于書中言位宁門臬榮霑之三條細加訂正不吝教誨夫人新著一書閱者翻一二頁卽置去非覆瓿卽飽蠹腹先生不以循爲淺陋屈意終覽示以可否誠今之古人不勝敬服循承教命更詳之因復取經文傳注及先生之言合諸寸心三閱晝夜終難釋然不敢不復諸長者循易鄭君榮霑之說者所以明四霑非四阿引喪大記者明諸侯有榮引斯干詩者明天子有榮益榮與霑天子諸侯皆有惟四阿天子有之諸侯則無鄙意篇中甚明著然此條易鄭義不敢向先生多辨也朝中爲

廷宮中爲庭二字自別說文又云痛中庭也宋痛爾雅爲梁棟之名則此庭指屋內言儀禮射聘喪祭等禮皆言中庭皆指階下無屋處言則中庭爲中廷之通借如盤庚之廷作庭也凡朝中俱謂之庭則不獨燕朝有中廷卽不獨燕朝之中廷左右謂之位都宮贊爾正正義云凡治朝外朝羣臣皆以廷之左右爲位若宁爲門屏之間與朝亦別當宁者負宁而立猶當依依在後也君背宁立於門外臣向宁立於廷之左右非謂門屏之間爲治朝也人君宁立處爲宁方百步爲朝混之爲一似非古訓諸侯內路門內則自屏至應門中隔一路門解門屏之門舍路門遠取應門遂以爾正此語專屬諸侯天子不得不改爲應門此說似亦近廷論語過位包與孔兩家自異不可強合曲禮下卿位鄭注云卿位卿之朝位也卿朝于治朝是治朝有臣位正義引鄉黨過位鄭注云過位謂入門右北面君揖之位

言入門右北面則是卿大夫之位言君揖則在治朝然則過位之位鄭君正指治朝臣位言其鄭君亦有誤乎君方下車而過孔子之色勃足躐可無疑也一臬二臬判自孔賈所以斷其爲二臬者正以鄭君玉藻注與賈氏合也玉藻云君入門介拂臬大夫中棖與闌之間士介拂棖注云君入必中門上介夾闌大夫介士介雁行于後來闌緊承君言雁行緊承上介言則夾者與君夾後者後于上介無疑鄭又申明雁行之義云示不相沿也蓋令大夫士亦隨介拂闌則嫌于相沿故一中棖闌之間一拂棖如雁行之斜行聘禮注引玉藻而釋之云門中門之正也以門中代中門知爲門之中非棖闌之中也又云不敢與君並由之敬也正以兩闌之中惟君獨行賓不敢並若一闌分行兩畔不可爲並矣然此猶不足以

定鄭君兩闌之旨惟下又云介與擯者雁行卑不踰尊者之迹亦敬也此語卽發明不相沿之義謂上介尊于大夫大夫尊于士上介旣拂闌大夫不敢沿之亦拂闌以踰其迹故中棖闌之間以爲敬若經文之中門卽棖闌之間則賓不中門大夫反中門斷無是理說見本書若謂獨行不可中門隨行可中門則大夫不敢踰上介之迹而轉敢踰君之迹恐非鄭君之義也循易鄭義處先生辨之循不敢多辨惟以先生遵鄭之故轉至違鄭是則急急欲與先生共議之者矣循學無師傳竊謂西京拘守之法至鄭君而貫通其經注炳如日星不難於阿附而難於精核果有以補其所不足則經賴以明不則其書自在非易者所能蔽詩箋多易毛傳禮注屢更先鄭鄭君說經之法正如是也先生以忠信待循循不敢自匿所知

以負盛意立言無狀伏乞諒之更賜以教誨幸甚幸甚

答葉太守論譜學源流書

王元啟

古者諸侯世國大夫世家氏族之傳不亂而又有宗法以維之雖數十世之後子孫皆能知其所自始迨周之季國亡族散人自爲生渙然靡所統紀漢司馬子長搜集古書遺文僅見五帝系謀尙書集世紀黃帝以來爲三代世表其後如官譜氏族篇稍稍間出魏晉而降有九品中正之法以門第官人雖卑姓雜譜皆藏於有司自是譜牒特盛迄於李唐猶相崇重五季之亂蕩然無復存矣後世爲譜學者悉宗宋歐陽氏蘇氏二家之書有序有譜有圖有錄有例具載集中最爲詳備自後元明以來諸家文集往往有族譜序論之作而譜與圖或闕元啟所見者王荊公爲許氏世譜元戴帥初爲其

先世居葬記明歸熙甫爲夏氏世譜及自爲歸氏之譜與國朝黃黎洲黃氏家錄續錄吾鄉海昌陳氏族譜諸書於世系分合及其前代遷徙源流較諸家序論之作爲特備今採其語可論者著於篇俾覽者自擇焉

漢太史公三代世表桓譚云史公爲世表旁行斜上並倣周譜按周譜不可見史公世表載史記第十三卷中又有將相名臣年表新唐書倣之別創宰相世系表略可見唐世諸大家世系源流其他私家之譜唐以前無考

宋歐陽氏之譜先序本始所出爲某帝王之後次及別姓受氏之祖其後遷徙源流及歷代顯者若干人次及本支始遷之祖次及祖宗之名諱近而可考者以及於已身兄弟之輩而後爲圖以表之則用史表之法以世次爲經而緯之以兄

弟嫡庶長幼之倫至已身而止復爲之錄先世行事之實及
官爵壽年葬處每一世各系數語其無可考者則云事迹闕
卒乃復爲譜例以發之以爲姓氏之出其來也遠故其上世
多亡不見譜圖之法斷自可見之世至五世元孫而別自爲
世謂譜圖橫列者隨其兄弟之多少紀之不能預爲限制以
遠近親疎爲別疎遠者略親近者詳凡諸房子孫各紀其當
紀者使譜謀互見親疎有倫並令以公所著譜圖冠其首
蘇氏之譜先序作譜大意次爲之圖圖載六世自其高祖以
次爲之錄錄分上下二篇上篇序本始所出及別姓受氏而
後遷徙源流以及近代名諱之可考者大意與歐陽氏譜序
同下篇則又詳記其高祖而下歷代行事之實至其父而止
大意與歐陽氏圖後所錄者同但歐陽氏人系數語雖其先

世旁支亦爲詳錄其文散而不屬蘇氏止錄本支四世故統貫而成一篇之文此爲小異歐陽氏譜後有例蘇氏則著其意於譜錄上篇之末令族人各自爲譜而各詳其宗而合之以吾譜則至於無窮而不可亂此卽歐陽公譜例之意蘇氏別有譜例一篇載之卷首考其文義乃自序此譜篇帙次第蓋猶今之序文爾與歐陽氏譜例不同蘇氏於譜之後又爲大宗譜法一篇其法冠以別子由別子而下各分嫡庶二子依次序列至於百世而無窮此則雖未及爲而存之篇末以俟後世君子有採焉

以上二家之譜小異而大同自二公所及知者列爲譜圖其餘疎遠者不紀而令各房子孫自爲紀錄合之而其譜乃全所謂小宗之法也

王荆公爲許氏世譜無圖系但歷序前世自古先帝王以及分封受氏而後顯者若干人下至近代之可知者特詳焉與歐陽氏譜序蘇氏譜錄略同但二家之譜於同姓之別爲一望者略及之而已荆公於許氏則雖其望於他郡而爲史傳所紀者悉採入焉至於本支則必考求其可據者錄之故雖兼列他望不相混也明代歸熙甫爲夏氏世譜及國朝黃黎洲家錄續錄皆如此但兼列他望以著族姓人才之盛至於世系昭穆未嘗爲攀援附合之詞也

元戴帥

初名表元世號剡源先生

爲其先世記數篇莫詳於小方門戴

氏居葬記記自八代祖而下小方門則其六代祖定居之地四傳至其祖別居坊郭又一傳至其父別居剡源而小方門之別又有仇村花園西宅洗馬橋諸派帥初所記於其本支

之名諱死生行事爲獨詳旁支則但記其兄弟而不及兄弟
之子其有以明經入學決科登名者則雖遠亦載焉蓋恐後
裔轉徙方張莫知本始故盡所睹聞記諸簡冊以遺子孫并
令別居諸族通得知之至於睹聞所未及者則如晉漢以來
厯代顯人但用一二語略述其槩而已蓋欲詳於此勢不得
不略於彼文之體製宜然非有意略其先世也歐序蘇錄於近代祖先專敘本支餘則列之於圖故有餘力以序前此厯代之顯人戴氏獨詳於近代兼及旁支遷徙之由其文已繁故前代止用

語括

明歸熙甫爲歸氏世譜二篇上篇自分封受氏以來敘至高
祖之曾祖及洪武初而止下篇則詳近代之可知者大意與
蘇氏族譜後錄上下二篇相近但歸氏所出者微莫知其得
姓所始於古帝王功臣何祖但就封國得姓以後言之而其

族又單故附著者惟元時居汴梁官學士者一人其在吳中者但云或居某地或居某地而不著其人蓋其人多無可書也其譜不載圖系蓋其家譜有之文集不載耳

熙甫爲夏太常家作世譜太常名昶父亮始孩隨其母適海虞朱氏因冒其姓後夏氏之老姑自滇南來尋訪其家獲亮告以其故始知先世居岷山及其曾祖以來名諱循是而上蓋已不可考矣故熙甫爲世譜序其得姓以來歷代名人見於史冊者畢錄焉至明初爲元帥總管者若干人及夏原吉湘陰人輔佐五朝與太常並時而別派者亦載焉以見禹之後世遺澤之遠然後入吳郡夏氏云云備序太常兄弟子孫官爵行事其序及太常之孫而止其後支庶並詳於圖譜國朝黃黎洲黃氏家錄不爲統紀雜記其先世行事之可考

者并旁及他處黃氏之賢者如石齋黃道周漳郡人與其父御史公尊素並時亦載於錄但必明述其里居與高陽許氏譜所載昌邑會稽汝南派吳郡夏氏譜所載洛陽夏恕湘陰夏原吉諸賢體例略同蓋自廬陵歐陽氏爲譜其本出於渤海而必兼載千乘之族眉山蘇氏其本出於益州刺史味道而必兼載趙郡扶風河南河內之蘇自後爲譜者必宗之往往兼及他郡之賢以自侈其族姓之盛但兩家之譜及兼及者猶有支派可考王荆公爲許氏譜則雖無可考者亦附列之荆公所附列者猶在本支數百年以前至熙甫爲夏氏譜梨洲爲黃氏錄則雖其並時而異派者亦列之此其異也海昌陳氏之譜其所列之圖大槩如蘇氏所爲大宗譜法自其始居海昌者爲祖禮所謂別子爲祖是也由別子而下至

若干世凡屬別子之子孫雖其支庶亦無不列但蘇氏法每
一世載其生子若干人適子爲宗庶子則低一字書之如第
一世別子生子甲乙二人至第二世甲乙二人又生子丙丁
戊己四人第三世丙丁戊己又生子庚辛壬癸子丑寅卯八
人每一世自爲一列故能多而不亂今陳氏譜則仍用歐蘇
小宗譜圖之例經者爲父子緯者爲兄弟至其分支繁衍如
兄弟四人而各有後者不能備列則又別起爲圖以盡其變
其別起爲圖者蓋不但一二而已此亦如史公三代世表初
則以祖宗爲經子孫爲緯至帝世以下有經無緯至周成王
以後則又以世爲經國爲緯蓋其所列世系繁多不能不屢
變其例亦其勢然也余所見吾禾著姓及他郡邑顯者之家
其爲譜大槩如此但海昌之譜序文之後便列譜圖並無世

譜之文亦不兼列他望

又嘗見龜山楊氏之譜先爲譜錄自始遷之祖以來列序其先世之可知者名諱履歷凡若干人後乃爲圖則自龜山先生爲始以至於今二十餘世圖後則又爲錄以記其先世妃姓葬地凡若干條亦無世譜之文不兼及他望

右所序列各家譜例雖孤陋之胸寡所見聞然大要亦不能外是今爲綜而論之爲譜而各詳其宗夫惟族人不知爲譜故仁人孝子慨然思爲譜以合之而仍令其族自爲紀則其族不仍歸於散乎震川之論曰無小宗是有枝葉而無幹也有小宗而無大宗是有幹而無根也又云爲譜者載其族之世次名諱而已其所不可知者無如之何其可知者無不載也今旣舉族而謀之爲之譜以合之大體自當畢載無間於

親疎遠近卽不能用蘇氏大宗之法姑從龜山楊氏及今海
昌陳氏之例可也所謂譜圖之法則歐陽氏斷自可見之世
爲始此論所謂百世以俟聖人而不惑者也惟是得姓受氏
之原爲子孫者亦烏可以不知他若前代名人載諸史冊足
爲後人觀法者雖非吾祖然爲譜者方將以禮義訓其族人
則雖他族之賢猶將取法也況其同出於得姓受氏之祖者
乎而使其子孫安於固陋不復知吾族之賢崛起前代以道
德文章卓然著見於世者爲何許人似亦非所以爲教然則
荆公之爲許氏世譜熙甫之爲夏氏世譜例可法也至欲兼
列並時之有德業名望者則黃氏家錄亦有明例今當於圖
系之前從龜山楊氏譜例參以黃氏錄之法先將前代有名
德位望略述其梗概兼及他望之賢者以爲族人觀法之資

然後遵歐陽氏之訓用海昌陳氏之法自其先世之可見者
爲始詳爲之圖以盡子姓之繁而其得姓受氏之原與其轉
徙遷流之故及自別子而下近代之居鄉有行實可紀者詳
爲之狀以求當世有道德而能文章者作爲世譜一篇以冠
其首則譜所宜有者庶乎其備矣

答金震方先生問律例書

袁 校

公以先君子擅刑名之學故將郵罰麗事採訪殷殷校趨庭
時年幼無所存錄但略記先君子之言曰舊律不可改新例
不必增舊律之已改者宜存新例之未協者宜去先君之意
以爲律書最久古人核之已精我朝所定大清律
聖君賢臣尤加詳審今之條奏者或見律文未備妄思以義
補之不知古人用心較今人尤精其不可及者正在疎節闊

曰使人比引之餘時時得其意於言外蓋人之情僞萬殊而國家之科條有限先王知其然也爲張設大法使後世賢人君子悉其聰明引之而議以爲如是斷獄固已足矣若必預設萬條成例待數萬人行事而印合之是以死法待生人而天下事付傀儡胥吏而有餘子產鑄刑書叔向非之曰先王議事以制不爲刑辟武帝增三章之法爲萬三千盜賊譙起大抵昇平時綱舉而網疎及其久也文俗之吏爭能競才毛舉紛如反乖政體蓋律者萬世之法也例者一時之事也萬世之法有倫有要無所喜怒於其間一時之事則人君有寬嚴之不同卿相有仁刻之互異而且狃於愛憎發於倉卒難據爲準譬之律者衡也度也其取而擬之則物至而權之度之也部居別白若綱在綱若夫例者引彼物以肖此物援甲

事以配乙事也其能無牽合影射之虞乎律雖繁一童子可誦而習至於例則朝例未刊暮例復下千條萬端藏諸故府聰強之官不能省記一旦援引惟吏是循或同一事也而輕重殊或均一罪也而先後異或轉語以抑揚之或深文以周內之往往引律者多公引例者多私引律者直舉其詞引例者曲爲之證公卿大夫張口拱手受其指揮豈不可嘆且夫律之設豈徒爲臣民觀戒哉先王恐後世之人君任喜怒而予莫違故立一定之法以昭示子孫誠能恪遵勿失則雖不能刑期無刑而科比得當要無出入之悞若周穆王所謂刑罰世輕世重杜周所謂前王所定爲律後王所定爲令均非盛世之言不可爲典要謹以先君子所私核者數條列狀於左伏候採擇

一調姦不成本婦自盡者擬絞此舊例所無而新例未協也事關風教無可寬弛然和與調無異調者和之未成者也其調者和在意中其自盡者變生意外其意內之槩尙在難加而意外之絞忽然已至誠可哀憐夫調之說亦至不一矣或微詞或目挑或謔語或騰穢褻之口或加牽曳之狀其至自盡者亦至不一矣或怒或慚或染邪或本不欲生而借此鳴貞或別有他故而飾詞誣陷是數者全在臨時詳審分別辨治若概定擬絞則調之罪反重於強也強不成止於杖流調不成至於抵死彼毒淫者又何所擇輕重而不強乎彼歐詈人人自盡者罪不至絞則調人人自盡者亦罪不至絞何也歐詈與調均有本罪而其他人的自盡皆出於意外孟子曰可以死可以無死死傷勇女不

受調本無死法律旌節婦不旌烈婦所以重民命也調姦
自盡較徇夫之烈婦猶有遜焉而旣予之旌又抵其死不
教天下女子以輕生乎俗傳有年少某悅鄰女揖而自媒
女拒之再揖而謝女歸縊死某竟擬絞合郡之人以爲三
揖三讓而死莫不掩涕愚以爲羞忿自盡者照罵歐人而
人自盡之條例有司臨時按閱作何調法以爲比擬其情
重者別請

聖裁

一律註內始強終和者仍以和論此本律所無而增例未
協也按註曰裂衣損膚及有人聞知爲始強之據又何所
見衣破復完膚創仍復爲終和之據耶夫相愛爲和女旣
愛之又何恨之而誣以爲強耶在被姦者必曰以強終在

强者必曰以和終信彼乎信此乎事屬黷昧訊者茫然勢必以自盡者爲強而不盡者爲和是率衆強而爲和也夫死生亦大矣自非孔子之所謂剛者誰能輕死女果清貞偶爲强暴所汚如浮雲翳白日無所爲非或上有舅姑下有孩稚此身甚重先王原未嘗以必死責之而强者之罪則不可不誅也今之有司大抵寬有罪誣名節以爲陰德然則不肖之人逆知女未必能死將惟强之是爲而到官後誣以終和則其計固已得矣或曰終和之據以叫呼漸輕四鄰無聞者爲和不知啼呼之聲果聞四鄰則姦且不成而强於何有强者大率華門蓬戶四鄰無聞而後敢肆行者也四鄰之人卽或聞之又誰辨其聲之始終乎又誰質證之以陷人於死地乎然則始强終和亦終於無據而

已矣律曰强者斬未成者流語無支節何等正大註中增以終和二字而行險徼倖者多按律文强者誅和者並杖凌暴之徒旣已辱人而又引與同杖以眾辱之惡莫甚焉就使婦志不堅自念業已被污而稍爲隱忍以免傳播其心亦大可哀矣較夫目挑心與互相鑽踰者罪當未減是始強終和就使確鑿有據而男子擬杖猶輕女子擬杖已重愚以爲律重誅心强者女當死調者女不當死然而或死或不死則其所遭者異也在强者之心業已迫人於死雖女子不自盡其罪重調者之心本不迫人於死雖女子自盡其罪輕今例註重其所輕輕其所重似有可疑一犯罪存留養親載在名律始於北魏太和五年金世宗引醜夷不爭之禮以除之極爲允當然律稱奏請

上裁是猶未定其必赦也今刑部或不上請但依例允行愚
以爲殺人者死雖堯舜復生不能通融孔子曰一朝之忿
忘其身以及其親非惑與可見三代無留養之文若此者
非聖人所矜也夫殺人者之父母何與于彼殺者之冤魂
忘其親殺人其不孝宜誅恃其親殺人其心術宜誅按律
內知有恩赦而故犯者加本罪三等惡其有所恃也彼恃
有留養之例而故犯者何以反得寬其本罪乎父母不能
教子致陷于惡雖老而凍餒亦所自取或聖王仁政務出
萬全則按其情罪臨期請旨亦可

一尊長殺卑幼律無明文尊名分故也考史冊亦頗不然
漢賈彪不按盜賊而先按母殺子者曰盜賊殺人事之常
有母子相殘違天悖理竟按致其罪是母不得殺子也趙

廣漢以丞相夫人殺婢曳夫人跪庭下受訊是夫人不得殺婢也唐敬宗時姑鞭婦至死有司請償是姑不得殺媳也馬端臨曰子有罪父不得而生則子無罪父不得而殺世宗憲皇帝特斬胡璉芳姦子婦者

皇上特絞徐某家奴者此皆聖明獨斷非凡所及愚竊以爲父母之于子女家長之于奴婢俱不應非理而殺其尤甚者姑殺婦妻殺妾也姑與婦本非天屬或待年之女幼在夫家受姑陵逼力難抵禦或悍妻嚴妒動用非刑地方官拘于名分擬以杖贖費金錢許人命較之雞狗所值尤微不知服制婦死姑報以期是殺婦者卽殺期服親也士妾有子而爲之總是殺妾者卽殺夫總麻親也在民家爲婦爲妾在

國家皆爲百姓在天地皆爲蒼生

皇上不忍殺一無辜之百姓而惡姑悍妻乃能殺無罪之蒼生其得罪于卑幼者小其得罪于天地

皇上者大請嗣後將尊長非理殺卑幼者別將寃酷情形分別治罪所保全實多

湖海文傳卷四十三